

山西通志卷第一百三十五

山西巡撫都察院右副都御史臣覺羅石麟奉

旨修輯

人物三十

絳州

明

梁溥字宏濟稷山人宏治己酉舉人陝西延川教諭博學洽聞見義勇爲時延安守安陽崔公陞重其才令署郡學遣其子銑受業焉外艱歸諸生哭別皆失聲服闋陞南京國子監學正三載考績陞慶府長史屢乞歸養王懇留之丁內艱後安化判逆瑾矯旨罰贖米四百石人謂以半賂瑾則免溥竟輸米服闋補秦府長史

楊謙聞喜人宏治壬子舉人知武城縣以才堪治繁調諸城復謫平山衛知事武城諸城父老千餘赴闕爭保銓部以單縣尤劇調單縣流賊聞名遠遁卒保城池蒙旌異進二級子勗肖嘉靖庚子舉人授洛川知縣政簡刑清識者謂有宓子之風

張環字瑤夫絳縣人宏治癸丑進士授棗強知縣陞階州知州資性剛方好學不輟建一菴自題曰菜菴

文皓字孔賜垣曲人宋潞公苗裔家甚貧晝鬻薪供父母夜則乘月讀書終夕不輟宏治丙辰進士知平原縣著喻民詩及民情利病條約屢折疑獄丁內艱上官熟其清苦檄賻贈之卻弗受補衡水縣清河奸民以田千頃投獻德府居人屢奏辨不能直勘得其實立返諸民擢監察御史

查遼東軍儲疏劾布按大吏時逆瑾用事道臣差回必以賄進皓獨無又治其私人孫恭如法瑾銜之屢遣人伺察無所得後往南京照刷文卷丁父喪衰服復命猶劾國公以下若干人補河南道疏論留都張尚書附逆瑾狀侍經筵劾中貴橫肆又上保民息盜六事並不報出爲河南副使督理河道令民五里內者赴工五里外者輸銀工成民不知勞魯山有習白蓮教者誅其首惡餘悉散遣歸農泣任三年再疏祈致仕家居二十年卒

陳希良絳州人宏治戊午舉人性嚴毅爲真定推官定州豪楊錫以產故控于巡撫巡撫委希良鞠之錫因以錦衣寇栩太監張雄書求庇希良不受繩以法栩與雄憤甚嗾錫訐希良陷於囹圄竟死嘉靖改元州守李文潔始以狀上

聞曹子汴爲之贊

李應奎絳州人宏治甲子舉人授平山知縣開誠布公與民相信凡八年陞陝州知州有楊昆父子含冤下獄應奎得其情力爲辨巡按執不可辨益力竟忤坐罷巡按以他事罷昆冤亦白平山祀名宦

申儒垣曲人貢生官寶慶經歷宏治間朱天章亂偕子逐之舟至洞庭遇伏被執不屈死當道爲立祠以祀焉

張滋字天潤猗孫宏治間貢士授遼東都司經歷剗剔宿弊不避權要陞靜寧知州適饑僅緩輯賑卹民賴安集世宗卽位進階朝列大夫

趙載初名君揆正德辛未登進士第賜今名因字文載垣曲縣人初官戶部主事歷員外郎中奉命督漕運抗疏言漕

政利病擢陝西叅議分守商洛道削平叛寇賜白金文綺
會土魯番侵哈密爲邊郡害總督楊一清以副使薦備兵
甘涼廷議掩擊爲便載請仿趙充國故事乃興屯練兵開
鹽召商士馬飽騰所向克捷番人牙木蘭帖木哥等各率
其衆來降遷叅政仍備兵其地擢僉都御史巡撫甘肅數
年政教修明威聲遠播異域相率讐伏晉南京右副都御
史提督擦江瀕行條列邊務十二事爲忌者所中事白尋
卒遣官諭祭治其墓廕子入監所著有都府奏議及忠貞
錄忠節祠集諸書

范昕字晦之絳州人正德癸酉舉人初官趙州知州值世廟
幸承天駕過次日行宮災大吏將移罪散僚昕不聽慨然
自認及同知承天御史以陵監家人橫肆不法屬昕鞠訊

昕論報如律陵監銜之誣奏御史及昕下獄戍南海昕言動意氣如常時不少變後遇赦歸萬歷中晉階四品

陶滋字時雨絳州人尚書謚恭介揆子正德甲戌進士初官行人值武廟南巡抗疏力諫伏輦下不起詔廷笞之幾斃謫國子監學正擢刑部郎中改兵部武選大禮議起以去本生二字伏蒲哭諫聲徹大內傳旨廷杖繫獄三年後仍謫戍世廟上賔有詔錄用已前二十年歿矣滋學問淵博爲學正時以石鼓文殘缺上下千古考覈精詳刊石鼓正誤一書隆慶初贈太常寺少卿

李淮字巨川聞喜人正德甲戌進士性孝友居鄉以行誼著初官刑部主事督太倉及密雲儲公廉明允屬吏皆知畏愛中官怙勢者亦感動有加禮已復督糧江南理餉遼東

擢四川叅議分守河西督邊餉有詔使奉命勘番人入寇情形受執政指將有所中傷淮極論夷情反覆國體宜正不可重爲欺罔詔使不能奪擢副使備兵岷洮總制王以諳練邊情奏留整理河西加叅政饑奉委散賑窮鄉僻壤必身親歷雖嬰疾不遑寢食至永壽嘔血數升未幾特命巡撫延綏疾益甚未蒞任卒淮潛心理學所著有詩經辨疑及小憲清通諸集

王時雍垣曲人正德丙子舉人授山陽知縣歷任武城華陰知縣門無私謁訟不淹滯倉庫有儲緩急有備以才德兼優陞徽州知州終西安同知所在政聲茂著

韓瓚絳州人正德己卯舉人歷教諭陞藍田知縣政尚廉平百姓爲立生祠陞漢中通判會妖人劉列謀爲不軌瓚監

軍督率有方斬首五十餘級生擒百餘人獲僞詔及妖書
欽勞金幣起補保定陞濟寧知州節愛有聲補通州兩院
才之京兆憎其傲調寧州致仕

陳韶絳州人萊陽丞正德間流寇攻城與子死之事聞贈登
州府通判卹廕如例

王价字君潘勸子正德間歲貢授鳳翔府推官廉明果斷獄
無冤滯屬岐郿二邑土貧俗惡官者難之价署篆事以德
感化卓有異政河州民番雜居茶馬滋弊當道者擇价往
易价防奸塞賄稱物平施甫三月而馬數至十萬民歌謠
如出一口

郭孜垣曲人以監生授四川威遠知縣勸農浚渠廣儲救荒
修學造士百姓有青天之歌以考績卒於京威遠士民在

京者咸製服舉哀後部民立祠追祀焉

景一元聞喜人嘉靖癸卯舉人授慶都知縣以清謹稱陞濟
寧知州路當衝繁舊額商稅千餘金俱申革之守正不喜
浮沉轉韓府長史夙夜匪懈王加禮重進階朝議大夫改
服俸九年辭歸王時存問焉年近九旬卒爲人純雅平易
歷官三任家無遺積至今邑稱清白

加傳字習夫稷山人嘉靖己酉舉人任曲周知縣卹里甲革
稅收犒河夫禁賭博生平無一事請托於人當官亦無一
事受人之托居喪哀痛卒年僅四十四人咸惜之

張守中字大石聞喜人嘉靖己酉舉人初任保定通判遷通
州知州庚戌之變總制某以敵人勢迫欲入城爲自守計
守中折以大義拒不納而饋運糧餉士馬皆宿飽事平擢

密雲兵備遷神木副使築邊牆甃神木城皆以身先士卒
與同甘苦擢僉都御史巡撫延綏一日御一騾隨一引馬
馳百餘里至守備城啓倉廩視之糠土強半卽呼首領官
令煮食之不能因治以軍法兵備譚二華叅將戚繼光皆
有宿望亦凜凜奉約束唯謹初至敵頗易之旣而出奇計
大破其衆相顧駭遁莫敢復犯延綏軍士素驕肆守中痛
繩之一夜挾弓矢射轅門者如林守中高臥不爲動次日
早起據堂皇召巡捕官問射者無一人敢應尋以勞卒于
官加副都御史贈兵部左侍郎賜祭葬如例

王宗舜號耕山聞喜人高祖臬刑部主事父澄清河訓導俱
有聲聞宗舜嘉靖壬子舉人癸丑聯捷進士任衛輝推官
執法明刑擢湖廣道監察御史卓有風裁不阿權貴有王

鐵面之稱陞臨清道副使遷陝西叅政以內艱歸不復出
謝賓客爲四柳園與稷山梁承齋猗氏何肖山諸人詩酒
自適兄宗堯癸卯舉人官刑部郎中

周心易絳州人嘉靖丙辰進士授廣平推官剛明嚴慎執法
有聲轉蘇州同知代吳縣審編三日報完升降允當吏民
欽服

趙三聘字天民號任齋河津人嘉靖戊午舉人隆慶戊辰進
士授益都令爲兵備其所忌諱河南藩司照磨尋遷江都
令邑苦徭役行條鞭法民稱便丁內艱服闋補獻縣導河
俾民無昏墊凡三令薦疏十上陞守禹州時中州苦盜嚴
行保甲法妖黨株連數郡禹獨無百姓建祠祀之入拜司
農郎督饟遼左督府顧冲菴數咨密議特疏薦擢四川按

山西通志 卷一百三十五
察副使備兵東川引疾歸年六十五卒

楊守川絳州人嘉靖辛酉舉人授富平知縣動履謹飭不妄交與防吏胥如寇愛百姓若赤子縣北山產石諸郡縣來採者故事縣代爲役里甲更班焉名匠班每歲費數千金百姓苦甚守川申請得均派民力得蘇其惠永矣

寧桂字攀之稷山人瑛曾孫嘉靖辛酉舉人少孤旣領鄉薦家徒四壁居母憂徒跣三年不食菜果不扇不爐任陵縣訓導教重倫行却一切饋遺士人思之陞國學晉工部司務戶部員外布袍脫粟躬親操作遷工部郎中卒於邸舍無楸柎之資同舍郎賻金歸襯

鄭命字爲命稷山人嘉靖辛酉舉人任宜君知縣申減夫贖五百餘金罷土官帶兵徵索之擾禁僚佐私交豪右之難

請賑救荒邑人德之謝政歸囊惟圖書衣冠而已子寅字
子夏萬歷癸卯舉人長安教諭轉國子監助教遷大理寺
評事累陞郎中山東按察司僉事

孫光祐絳州人嘉靖壬戌進士授承天推官陞文選司郎中
歷遷應天巡撫分考鄉闈得蕭良有在選司官惟其人請
託不行吳當大水後請蠲夙逋無慮數百萬石妖僧起京
口構結甚衆光祐殲渠魁餘置不問在蜀故事蜀藩朝賀
五叩頭光祐請如制王曰誠如先生言第彰先王之過奈
何光祐曰克蓋前愆正在此舉王從之終南京戶部侍郎
翟繡裳號左溪聞喜人嘉靖壬戌進士授雄縣知縣補商邱
入爲兵部主事條陳邊計擢關西分巡道狃民叛單騎入
寶雞諸山寨宣諭之衆皆伏遷山東叅議轉叅政分守遼

海遷按察使兵備密雲晉山東右布政使擢右僉都御史
巡撫順天甃山海關牛欄山熊兒峪等城修石塘潘家桃
林等口昌平黃花等嶺審子峪鷓子洞等處胥關地方百
年大計尋以邊警起力主用兵不合再疏乞致仕築圃涑
水上聚圖史日夕其中以名檢自勵編族譜置義田優游
閭里二十餘年卒

姚鏜字鎮遠稷山人嘉靖初貢廉靜寡欲篤學力行任饒陽
知縣單騎赴任居御無異寒士日教民忠孝守法徧植桑
棗民利賴之以剛直忤權貴左遷寧夏衛經歷操守愈堅
致仕歸杜門讀書不入城市

韓科絳州人重曾孫嘉靖間貢授濟南通判運糧指揮有貪
肆者民甚苦之科力陳當道斥去民豎碑頌之陞葭州行

之日庫有羨金三百申上封識之葭久荒多方招集賑恤
陞韓府長史

許恩字仁甫絳州人隆慶庚午舉人知寧陽募民闢荒給以
牛種逃者咸復業稱樂土起補館陶會潞藩之國取道於
陶恩名素重諸從者秋毫無犯尋陞刑部郎中

高應聘字志尹稷山人隆慶辛未進士吳縣知縣釐弊革奸
不避權貴邑瀕太湖濟渡處多劫寇應聘更番設戍行者
便之吳民題曰高公渡范文正公義田爲豪右占幾盡應
聘置於法遂按籍而還爲讐者所中謝政歸講藝課文賑
饑濟貧間里咸推重之

裴賜稷山人隆慶辛未進士授兵部主事鎮山海關轉車駕
會上謁陵從大司馬扈蹕欲輦金共事尚書不可輒輦金

以行抵昌平上命犒師計數千金賜猝辦人驚異之遷職
方有大璫餽金干以私怒斥去庚辰例當典春闈江陵爲
其子預授以意不應遂易他曹尋出治兵井陘諷言官中
以他事謫華州知州不赴歸

王之翰字維藩絳州人萬歷元年舉于鄉銓膚施知縣補棗
陽有爲崔駟筮易林者不吉之翰笑曰孔僖不辭晉翰乃
辭棗陽乎稅監陳奉欲開青山礦之翰以顯陵近執不可
奉誣劾之翰聚衆并及襄陽通判邸宅推官何某後之翰
報僉事馮某書曰竊聞君有不達爲不明臣有不爭爲不
忠翰雖去公在猶可藉手忠報天子翰死無所憾馮某乃
極言奉惡給事中田大益御史李以唐等又合疏爲之翰
言卒命緹騎逮訊并逮馮某宅何某之翰瘐死天啓初贈